



Xueves, 24 de setiembre del 2020

El Gobiernu concede la Medaya d'Oru d'Asturies a títulu póstumu a Vicente García Riestra, últimu superviviente español del campu de concentración nazi de Buchenwald

- El gallardón, propuestu pola Xunta Xeneral, reconoz la entrega de toa una vida dedicada a la defensa de la democracia y los sos valores
- El Principáu va formular un requerimientu previu contra l'Alministración Xeneral del Estáu pa que se compensen los perjuicios económicos derivaos de la modificación del sistema de xestión y liquidación del IVA correspondiente al 2017
- Autorizáu un gastu de 2,7 millones que va dexar ufiertar orientación profesional a más de 11.000 desempleaos
- L'Executivu va destinar 7,3 millones en subvenciones p'ameyorar la eficiencia enerxética d'edificios los trés años vinientes

El Conseyu de Gobiernu decidió güei conceder la Medaya d'Oru d'Asturies, a títulu póstumu, a Vicente García Riestra, en reconocencia a la so defensa de la democracia y los sos valores. L'Executivu rinde homenaxe asina al postrer superviviente español del campu de concentración nazi de Buchenwald “n'exerciciu de la obligación ética, política y moral como poder públicu na recuperación de la memoria democrática”.

D'esta manera, dase cumplimientu tamién al alcuerdu adoptáu'l 16 de setiembre del 2019 pola Mesa de la Xunta Xeneral pa proponer al Conseyu de Gobiernu la concesión d'esta alta distinción a Vicente García Riestra.

Nació en La Pola Siero'l 20 de xineru de 1925, García Riestra morrió en Trélissac (Francia) el 9 de mayu del 2019, depués de sobrevivir al horror nazi en Buchenwald (Weimar-Alemaña). Exiliáu al país vecín tres de la guerra civil, ellí xuntóse a la resistencia francesa cuando la Segunda Guerra Mundial. El 24 de xineru de 1944 foi deteníu pola Gestapo, torturáu y unviáu al campu de concentración alemán, del que foi lliberáu'l 11 d'abril de 1945, xunto a los demás prisioneros.



A lo llargo de tola so vida lluchó pola recuperación de la memoria histórica y nos sos últimos años dio charles divulgatives en centros educativos d'España y Francia pa cuntar la so esperiencia, defender la llibertá y concenciar a la mocedá sobre les consecuencias del nazismu.

Vicente yera'l séptimu de los diez fíos del matrimoniu formáu por Gregorio García Lavilla y Áurea Riestra Morilla, y la so historia recoyóse nel llibru *42.533: Después de Buchenwald*, de Xuan Santori, que ganó'l XXIII Premiu Máximu Fuertes Acevedo d'Ensayu, concedíu nel 2017 pol Principáu.

La Medaya d'Asturies acútase, según la Llei 4/86, de 15 de mayu, Reguladora d'Honores y Distinciones del Principáu, pa premiar méritos verdaderamente singulares que tengan persones o instituciones con una importancia y trascendencia pa los intereses xenerales de la comunidá que los faiga acreedores d'esta reconocencia pública. Según recueye la norma, va poder otorgase a persones muertes, siempre que l'espedito empiece primero de que pasen dos años de la fecha del decesu, y va dase "preferentemente" coincidiendo cola celebración del Día d'Asturies, el 8 de setiembre. La situación tan escepcional provocada anguaño pola pandemia del coronavirus retrasó l'aprobación del correspondiente alcuertu del Conseyu de Gobiernu. El próximu 8 de setiembre va superase'l plazu llegal previstu pa la concesión de la medaya.

Reclamación del IVA del exerciciu 2017

El Gobiernu acordó autorizar a la consejera de Facienda a formular el requerimientu previu contra l'Alministración Xeneral del Estáu pa que s'adopten les midíes pertinentes cola mira de compensar al Principáu polos perxuicios económicos, directos y indirectos, derivaos del cambéu del sistema de xestión, liquidación y contabilización del IVA correspondiente al exerciciu 2017.

Esti procedimientu quedó paralizáu tres de la declaración del estáu d'alarma. Agora, cola presentación inmediata del requerimientu pola consejería, va dase un pasu más en defensa de los intereses d'Asturies, al reclamar unos recursos que-y correspuenden.

El Principáu va siguir optando pola negociación y l'alcuerdu como vía preferente, pero ta dispuestu a usar tolos medios políticos, alministrativos y xudiciales al so algame pa obtener la mensualidá pendiente del IVA correspondiente al 2017, porque se trata d'unos fondos p'ameyorar los servicios públicos, impulsar la economía y, en resumíes cuentas, atender los intereses de la comunidá autónoma.

Acciones pa la orientación profesional y l'autoempléu

L'Executivu autorizó un gastu plurianual de 2,7 millones destináu a subvenciones p'acciones d'orientación profesional. Esta convocatoria va dexar atender a más de 11.000 paraos, a los que se-yos va brindar la posibilidá de realizar itinerarios personalizaos d'empléu.

Xuntu col diseñu d'esos itinerarios, que van entender acciones individuales y grupales, va realizase un siguimientu individual, que va dexar afaer les actuaciones a la evolución de cada persona p'ameyorar les sos competencies y empleabilidad. Na so execución collaboren entidaes ensin ánimu d'arriquecimientu de toa Asturias, lo que dexa esanicar cualquier discriminación por razón de residencia en núcleos rurales alloñaos del centru.

Amás, nel programa rematáu nel mes de mayu pasáu, que se vio afectáu pol periodu de confinamientu, les entidaes siguieron dando apoyu a les persones desempleaes de forma telemática, una medida pervalorada polos participantes.

La convocatoria nueva va volver desenvolverse a lo llargo de 24 meses, como yá asocedió cola de 2018-2020. D'esta manera, el Serviciu Públicu d'Empléu (Sepepa) ufierta más estabilidá nesti recursu pa la orientación llaboral, que complementa la xera realizada pol personal propio nes oficinas d'empléu.

Esta medida enmárcase na Estratexa Española d'Activación pal Empléu 2017-2020 como una ferramienta fundamental pa rebaxar el paru y los periodos de desempléu, amás de p'aumentar el grau de satisfacción de la ciudadanía colos servicios públicos d'empléu.

Medio millón pa menguar riesgos llaborales

El Conseyu de Gobiernu aprobó un gastu de 525.000 euros pa dar continuidá a la llinia d'ayudes empobinaes a menguar o eliminar riesgos llaborales cola meyora del parque de maquinaria y los equipos de trabayu.

Les subvenciones cubren inversiones pa la renovación de máquines, equipos, instalaciones o otros elementos que dexen aumentar la seguridad na redolada llaboral. Estes ayudes, recoyíes nos alcuerdos de concertación hasta l'añu pasáu, inténgrense nel plan +Prevención+Empresa. Dada la importancia de caltener los oxetivos d'esa iniciativa, el Principáu considera necesariu'l so caltenimientu.

Ayudes p'amenorgar el consumu enerxéticu n'edificios



El Gobiernu d'Asturies aprobó una partida de 7,3 millones que se va destinar a una convocatoria plurianual de subvenciones pa la rehabilitación enerxética d'edificios. Con estos fondos, la Consejería de Derechos Sociales y Bienestar va sofitar actuaciones n'inmuebles que precisen sistemes más eficientes de consumu.

Los fondos pártense en trés anualidaes: 2.937.052 euros nel 2021, 3.671.316 nel 2022 y 734.263, nel 2023.